


ÌWÉ YÈÉ PÓLÙ KÇ LÇ FÍ TIMOTÉÈ GBO TÍTÌ GBO È

**ÌWÉ-E TIMOTÉÈ ÀKPÀSHÈ GBO ÈKÉJÌ GBO
KÁNNÁ TÍTÌ**



ÌWÉ-E TIMOTÉÈ ÀKPÀSHÈ GBO ÈKÉJÌ GBO KÁNNÁ TÍTÌ

1 et 2 Timothée et Tite

Imprimé par :
Association Ìlòsíwájú Èdè Ìdàáshà (I.E.I)

1^{ère} Edition, 1^{er} tirage (500 ex)

© 2016 Association Ìlòsíwájú Èdè Ìdàáshà (I.E.I) et Wycliffe Benin

BP : 18 Dassa-Zoumé ; Tél : 94 30 55 22/97 56 57 99/21 32 50 43

Email : literacy@wycliffebenin.org/prosper_nongnide@sil.org

ÌWÉ ÀKPÀSHÈ FÍ TIMOTÉÈ

Ìwé àkpàshè fí Timotéè

Ìmúdíye ìwé àkpàshè fí Timotéè

Timotéè ti lí ìlú Lisítrù l'érè-e Galátì. Ìnà è jí olígbàgbó, shí ó jí Jùú. Àmá iba è yè jí ɔni Gèrékì an. Shí yèé Pólù lòkóò kéké kédè ìyìn rere ti Jesúù l'áunkéjì ó nií ó kpàdé Timotéè lí ìlú Lisítrù è. Àgbà ijɔ àán yin ijáráí rere lá Timotéè fú u, shí ó sè kpè úní kó wa shishé Olórun ùungbo ùun gbo (Ìwé ishe 16. 1-3).

Yèé à fànà lòkóò ó, à gbà lí ìlú Efésì, shí yèé à tó bè ó, à rí fòní olígbàgbó an ó wà bá ìshòro kpíkpàdé, shí ìgbàgbó wan kò wà lí ìlòsíwájú. Yè she shí Pólù kò Timotéè jòó si lí ìlú ó l'íbè, shí ó ní kó wà mójútó an, shí kó wà dárayin án l'ínú ìgbàgbó. L'íbè nií Timotéè wà, shí Pólù kò ìwé yèyí nikò lò fú u è.

Iwun yèé kpánjú fí Pólù, shí ó fu kò ìwé ó nií:

- ó wí yebá adarí ijɔ àán láti gbé gbà ó (1 Timotéè 3)
- ó ní Timotéè kó shóra è lá akéèkó òdì an (1 Timotéè 4 kánná 6)
- ó ré ní Timotéè kó mú ojú tó ishé ikéde ìyìn rere ó.

1

Okukínkín

¹ Wòm Pólù yèé Olórun Olígbàlà wa kánná Jesúù Krísù yèé àá mú ifojúgbè wa si lá ó yàn, shí ñ jí jeunkú Jesúù Krísù ó nií wà kò ìwé yèyí fí wòò Timotéè è. ² Ñ wà kín ε, wòò yèé jí ɔma ùum kpíkpé torí yèé ò gba Jesùù Krísù gbó è. Ore òfí, idíròjú kánná tútù yèé ti l'édò Olórun Iba ó ùungbo Olúwa wa Jesúù Krísù gbo ó kó wà ùungbèegbo.

Pólù wà te Timotéè l'ésè lá akéèkó òdì an

³ O gbé lí ìlú Efésì yebá ñ ti kpa ú l'áshe féé l'írè yéé ñ mú ònà lòkóò lítálè Maseduánì ó, torí o kò fí ɔni yéé wà l'íbè, shí à wà kó òníyàn an lí èkó òdì an ó ní ká mí. ⁴ O wí fú an ní, ká kó èrán asán an jòjó kánná èkó lítá ìtan okù bíbí títétíté an yéé àà kà, shí kèè tán láyé è; torí àránnjìyàn nií iwun yéénì an éè fà wá è; kèè bi shí ètò Olórun yéé àà mà bójí à gbàgbó ó kó shé. ⁵ N wà kpàshe yéénì féé, torí e lí ìfé yéé éè ti l'ókàn mímá, ìsérè rere kánná ìgbàgbó kpíkpé è. ⁶ Torí òníkàn án yako ló, shí à mú ònà òmírìn, shí à kéè nù gbà lí ìyìn èsebede yéé àà wà wí è. ⁷ Àà wà fu ara wan fu kpe akòwé òfin àan, ítán shí a kèè ríran si lí iwun yéé àà wà wí an ó, béè jáñ a kèè sè ré ríran si lí ìyìn yéé àà tekpán má fu wí an ó ni.

⁸ Lí èyító ó, àá mà ní òfin ó jí iwun rere, bójí à yóò yìn ú yebá ó ti ye gbà è. ⁹ Kó ko ye ni ní: a kò dá òfin ó si fí ológangan àan, àmá à dá u si fí ɔni yéé éè kò ní àan kò kó yin òfin Olórun àan ó, fí ashàràgbóràn an, fí ɔni yéé kèè sá fí Olórun àan ó, fí éléshè an, fí ɔni yéé kèè lí ibérù fí Olórun kánná iwun mímá an ó, fí ɔni yéé éè kpa ìnà wan nùmí iba wan kúkú an ó, fí akpàniyàn an. ¹⁰ À dá òfin ó si fí àlùwá an, fí olokìnrin yéé éè wà sùn bá olokìnrin nùmí olobìnrin yéé éè wà sùn bá olobìnrin àan ó, fí ɔni yéé éè ta erú an ó, fí éléewá an, fí ɔni yéé éè búra, shí a kèè she si lítá è an ó kánná ɔni yéé éè wà she iwun yéé kò bádé má èkó kpíkpé ó è. ¹¹ Èkó yéénì sè jemá ìyìn rere yéé à mú bò l'ówó fú um, shí ó wà wí ìyìn lá Olórun ológo yéé éè tûre fí òníyàn è.

Pólù wà dókpé fí Krísù

¹² N wà dókpé fí Olúwa wa Jesúù Krísù yéé fú um lí àmí, shí ñ fu shishé è. Lí èyító ó, ó lí ìkara lá um, shí ó yàn úm fí ishé è ¹³ yéé màà na ti yárun lá è,

shí màà dókpò fú u, shí màà ré bú u è. Àmá Ọlórun díròjú um, torí n kò gba Krísù gbó l'ásìkò yèénì, shí n kò sè ré ma iwun yèé ñ wà she è. ¹⁴Lí èyító ó, Olúwa wa da ore òfè è bò úm l'áshànkù. Shí ó fú um lí ìgbàgbó kánná ifé yèé ñ dàkpò ùungbo Jesuù Krísù gbo è. ¹⁵Ìyìn èyító kàn ko nií, shí ó ye núwan ònìyàn kpóó kó gbà ú gbó; ùun nií jí: Jesúù Krísù wá lí ìtálè bibí, shí kó wa gba eléshè an là, shí wòm sè jí eléshè kpere eléshè an kpóó ni. ¹⁶Àmá Ọlórun díròjú um, torí Jesúù Krísù kó gbà lítá wòm yèé jí eléshè kpere eléshè an kpóó ó, shí kó mú inúrere è díye. Yèénì ó, mà n jí ìwòlá fí ɔni yèé e kó wa gba Jesúù gbó an ó, shí à ká rí àyè matán-matán.

¹⁷Olá gbo ògo gbo fí

Olulú yèé ijòyè è kò lí ìkparun ó;

ó jí Ọlórun àràkú, Ọlórun yèé a kèè fu ojú rí, Ọlórun òbú tookpokpo yèé
wà

fáyé matán-matán è. Kó shé.

¹⁸Oma ùum Timotéè, ñ wà mú ishé yèyí bò l'ówó féε, shí ó bádé má iwun yèé Ọlórun ti ní ε kó shelè lítá ε, shí à ti wí féε è. Ìyìn an ó kó fú ε lí ìdárayin, shí o fu jìjà rere ó, ¹⁹ùungbo ìgbàgbó gbo, ɔkàn rere gbo. Òníkàn án kò ní àan kò kó retí iwun yèé ɔkàn wà wí fí àan ó, shí ó she shí ìgbàgbó wan kú. ²⁰Imenéè gbo Alesándrì gbo-ó wà lí èérin wan, shí ñ yòunda wan fí Èshù, torí ká mà ní a kèè yárun lá Ọlórun.

2

Pálù wà wí ìyìn lá àdúwà gbígbà

¹ Iwun àkpàshè yèé mà n bérè ná iín ́ níí jí, e wà bere iwun ná Olórun, e wà gbàdúwà, shí e wà shìkálè fú u, shí e sè ré wà dókpé fú u. E wà she iwun yéénì an l'éríwo òníyàn kpóó. ² E wà gbàdúwà fí olulú an kánná ɔni kpóó yèé yo wà lítá àrítàn oyè an è; torí àfo gbo tútù gbo kó gbé fí ni shí iwun shíshe wa kó yo sàn l'ójú Olórun kánná l'ójú òníyàn an. ³ Iwun yèé éè sàn, shí éè she ìyánjú l'ójú Olórun Olígbàlà wa ́ ní. ⁴ Ùun yèé wà wò shí òníyàn kpóó kó rí ìgbàlà, shí ká sè ma iwun yèé jí èyító è.

⁵ Lí èyító ́, Olórun òbú tookpokpo wà ni,

béè òbú ́, aláàréñà òbú tookpokpo sè wà lí èérin Olórun gbo òníyàn an gbo ni:

Ùun níí jí Jesúù Krísù yèé jí òníyàn è.

⁶ Ó mú ara è jó torí kó ra òníyàn kpóó kpadà kóò l'ínú èshè è.

Shí yèé àsìkò yèé à dá ́ kò ́, ó mú díye yèé ó ra ni kpadà ́ ní, Olórun wà wò shí òníyàn kpóó kó rí ìgbàlà.

⁷ Iwun yèé she shí Olórun yàn úm, shí n jí akédè ìyìn rere kánná jéunkú Jesúù ́ ní. Ó yàn úm, shí n wà kó ɔni yèé kò shi Jùú an ́ lí èkó l'Ékpasè ìgbàgbó gbo èyító gbo. Èyító ñ wà wí ni, n kò wà shàá.

⁸ Báni, ñ wà wò shí líbi olokìnrin àán yóo shajó si l'ídì kpóó ́, ká wà gbé ɔwó l'ókè, shí ká wà gbàdúwà ùungbo ɔkàn mímá gbo. Kó ma sè wà jí ùungbo inúkíkan gbo nùmí asò.

⁹ Ñ wà wò shí olobìnrin àan katún ká wà wó ènù yèé bádé núwan ká wò è; ká wà wó ènù yèé ε kó wà gbé an ga ́, kó ma jí iwun ojukórí: ká ma wà di

irun, shí ká wà dá àshà si línì, ká ma wà wò iwun ewà yèé à mú wúrà fu she àan ó, nùmí wòrò olówó iyebíye, ká ma sè ré wà wò èwù olówó dódó.

¹⁰ Kàkà béè ó, ká wà mú ewà wan díye gbà lí iwun rere shíshe gégébá ó ye shí olobìnrin olífkànsìn an ká wà she è. ¹¹ Olobìnrin àan ká wà gbé jéé, shí ká wà lí ìteríba l'írè yèé à wà gba èkó è. ¹² N kò fú olobìnrin lí àshé ní kó kó ònìyàn an lí èkó nùmí kó kpàshé fí olokìnrin. Ó láti gbé jéé. ¹³ Lí èyító ó, Adámù Olórun kpàshè dá ni, shí l'eyìn béè ó, ó wa dá Éfà. ¹⁴ Kò sè shi Adámù Èshù shiyèrú, àmá olobìnrin ó ní Èshù rú, shí ó shàrigbóràn fí Olórun è. ¹⁵ Ó wà béè ítán shí Olórun e kó gba olobìnrin ó là gbà l'óma bíbí è, bójí ó yó mú kunkun lá ìgbàgbó, shí ó lí ifé fí ɔmanà, bójí ó lo ìgbési ayé mímá, shí ó lí ɔkàn ìrèlè.

3

Adarí ijɔ àan

¹ Ìyìn ìkaralá kàn ní: bójí òníkàn wà dabá ikpò adarí ijɔ, ishé rere ó wà dabá ni. ² Yéénì ó, ó bádé shí adarí ijɔ ó kó jí ɔni yèé a kò kó rí iwun shínshinrìn kàn wí lá è. Ó láti lí aya òbú tookpokpo, shí kó wà she iwun l'íwànbà, shí kó ré ma ikpò ara è. Ó bádé shí kó lí ìwà rere, kó wà gba àlejò rere, shí kó sè ré jí ɔni yèé e kó yó kó ònìyàn an lí èkó è. ³ Kò láti jí àmòtí, nùmí onìyàn àrùnra. Kàkà béè ó, kó jí ònìyàn olísùúrù, kò ma jí olíwàhálà, shí ojú è kó ma sè gù lá owó. ⁴ Ó láti wà darí ojúlé è rere, shí kó wà kó ɔma è an lí èkó, shí ɔma è an ká wà gbóràn, shí ká ré lí ìteríba lí iwun kpóó. ⁵ Lí èyító ó, ɔni yèé kò yó darí ojúlé è ó, básí e kó ko ti yó mó ojú tó ijɔ Olórun gbà? ⁶ Kó ma jí ɔni yèé gbàgbó tuntun ó, bí kò shi béè, ée yó kàn rírí ara è,

shí Ọlórun ε kó débi fú u yebá ó débi fí Èshù è. ⁷ Ó bádé shí ɔni yèé kò gba Ọlórun gbó an ó katún ká wà yin ijári rere lá è, torí òníyàn an ká ma rí iwun shínshinrìn kàn wí lá è, shí kó shubú jì lí kpòlò Èshù.

Abésè adarí ijɔ àan

⁸ Abésè adarí ijɔ àan katún láti jí òníyàn olíwà rere, shí ká wà wí èyító. A kò láti jí àmòtí, a kò sè láti wà wo owó lí ìwòkúwò. ⁹ À láti baní èyító ti ìgbàgbó yèé Ọlórun shígbá lítá fí ni ó rere ùungbo ɔkàn mímá gbo. ¹⁰ À láti kpàshè dán an wòrí, shí bójí a kò rí iwun shínshinrìn kàn wí lá an, ká kan ishé abésè adarí ijɔ lígàyí.

¹¹ Olobìnrin^a àan katún láti jí òníyàn olíwà rere. Ká ma wà shìkpèríkó. Ká wà she iwun lí ìwànbà, shí ká ré jí òníyàn yèé éè gbé l'òwó lí iwun kpóó è.

¹² Abésè adárí ijɔ láti lí aya òbú tookpokpo, ó sè láti wà mú ojú tó ɔma è an, shí kó ré wà darí ojúlé è rere. ¹³ Lí èyító ó, àà bu ikpò fí abésè adárí ijɔ yèé wà shishé wan rere è. Shí àan katún an àà wí ìyìn ùungbo ìkaralá kpíkpé gbo lá ìgbàgbó yèé da ni kpò gbo Jesúù Krísù gbo è.

Iwun àràiyé èdá ti ifɔkànsìn

¹⁴ N wà kɔ ìwé yèyí fée, shí n̄ sè mà ní mà n wáa rí ε l'árìkpín. ¹⁵ Àmá bójí n kò yá wá, ìwé yèyí ε kó she shí è sho ma yebá ò láti gbé gbà lí èérin ɔma Ọlórun àan è. Àan níí jí ijɔ Ọlórun àyè, shí à ré jí òkpó kánná iwun yèé baní èyító ó si è.

¹⁶ Èyító ni, ɔníkàn kò kó yo fà ú! Èyító ti ìgbàgbó yèé Ọlórun mú díye ni ó lákún.

^a3.11 Àa yóó ní aya abésè adarí ijɔ nùmí olobìnrin abésè adarí ijɔ

Krísù ó wá lítálè bibí baní ònìyàn ni;
Èmí Mímá mú díye ní ó jí ònìyàn ɔlógangan;
Ìjíshé òrun àán fu ojú kàn ú;
À kédè è fí aro èdè an kpóó;
shí ònìyàn án gbà ú gbó lítálè ayé ó;
Shí ɔlórun gbé u gu òkè òrun lo l'ínú ògo.

4

Iwun yèé ɔlórun dá an ó kpóó sàñ

¹ Èmí Mímá tekpán má u rere ní, l'ójá ìkényìn an ó, ònìkàn an à ká kò ìgbàgbó jòjá, shí à ká tìná èmí arúnije kánná èkó èmí búbúrú an. ² À ká tìná ònìyàn olíwà ìbòlè, eléèwá yèé ɔkàn wan ti le si, baní à fu irin gbígbóná fu sàmì lá ɔkàn wan ni, shí àan yèénì an à ká kéè mú an nùnà. ³ Àà kò fí ònìyàn an ní ká ma lí aya nùmí ká ma lí ɔkò, shí àà ré ní ká ma je ìje kàn an. ɔlórun nií sè dá ìje yèénì an, torí krísiánì yèé ma èyító an ó ká wà díkpé fí ɔlórun, shí ká wà je án è. ⁴ Eyító ni, iwun yèé ɔlórun dá an ó kpóó sàñ, shí kò sí ká mú ìkàn kata, bí kò jí ká téwó gba kpóó, shí ká díkpé fú u. ⁵ Lí èyító ó, ìyìn ɔlórun ó gbo àdúwà gbo éè sò iwun kpóó di mímá.

Èkó fí ìbèlíshe rere ti Jesúù Krísù

⁶ O kó ɔmanà l'ínú Krísù an lí iwun yèénì an, yèénì ó, è sho di ìbèlíshe rere ti Jesúù Krísù; shí èe wà mú díye ní, lí èyító ó, ò tìná ìyìn ìgbàgbó kánná èkó kpíkpé yèé à kó ε ó. ⁷ O wà yìn fí ìtan yèé kèè l'órun, shí kèè ré je má ìgbàgbó è. Kàkà béè ó, o shagbóra, shí o wà she iwun yèé éè sàñ l'ójú ɔlórun è. ⁸ Ara ni gbígbàn ó jí iwun rere, àmá fí iwun odé kàn ján ó sàñ fí ni;

ifjikànsìn yèénì yè sànlí iwun kpóó, torí éè fú ni lí àyè l'ayé bibí kánná l'ayé yèé lèwa è. ⁹ Ìyìn yèénì jí ìyìn ìkaralá, shí ó sè bádé shí òniyàn kpóó kó gbà ú kún. ¹⁰ Lí èyító ó, àá mú kunkun, shí àá wà kpara kata l'ónà ishé^b, torí àá lí ifojúgbè lá Olórun àyè yèé jí Olígbàlà òniyàn kpóó ó, shí kpàtákí ó, Olígbàlà ɔni yèé gbàgbó an è. ¹¹ Iwun yèé ò láti wí, shí o kó òniyàn an ó nì.

Pòlù ní Timotéè kó jí ìwòlá fí olígbàgbó an

¹² Máa jé shí òníkàn kó wo ojú ε, torí yèé o kò jí ològbó è. Kàkà béè ó, o jí ìwòlá fólígbàgbó an lí ìyìn, lí ìwà, lí ìfē, lí ìgbàgbó kánná lí ìgbésí ayé míímá lílò. ¹³ Ítán shí n wá ó, o múra, shí o wà ka ìyìn Olórun ó fí ìjó, o wà dárayin án, shí o wà kó an lí èkó. ¹⁴ Èbù Èmí Mímá yèé ò rí gbà l'írè yèé alágbàwí Olórun àán wí ìyìn, shí àgbà ìjó àán mú ɔwó si lítá ε ó, máa mú kpánlè. ¹⁵ O mú ojú tó iwun yèénì an rere, shí o sè fu ara fú an t'òkàn t'òkàn; yèénì ó, òniyàn kpóó ε kó sè rí ilcsíwájú ε. ¹⁶ Shàkíyèsí ishísè ε gbo èkó yèé ò wà kó òniyàn an ó gbo; o mú kunkun, shí o tèsi l'íwájú lí iwun yèénì an. Bójí ò wà she béè ó, Olórun ε kó gba wò gbo ɔni yèé wà retí ε àan ó gbo là.

5

Yebá krísiáni án láti gbé léerin ara wan è

¹ Máa wà fu owùn líle fu bá àgbàlágba fò. Àmá o wà dárayin ú baní iba èe ó jé ni, shí o wà she iwun ùungbo ɔmòshó an gbo baní ɔmanà ε àan l'ólokìnrin à jé ni. ² O wà she iwun ùungbo olobìnrin yèé ti jí ològbó an ó gbo baní ìnà ε àan à jé ni, shí o sè ré wà she iwun ùungbo ɔkàn míimá gbo bá olobìnrin yèé ɔdún wan kò lò ná an ó baní ɔmanà ε àan l'ólobìnrin à jé ni.

^b4.10 Lí ìwé àfowókò àan ó, ɔkàn an ní: àà bú ni.

Akúkɔ àan

³ O wà mū ojú tó akúkɔ yèé kò lí aláàbáwí an ó, shí o wà lí ìteríba fú an.
⁴ Àmá, bójí akúkɔ kàn lí ɔma àan nùmí ó lí ɔma-á kpè ú lí màmá an, ó bádé shí ɔma yèénì an ká kpàshè wà mū ìgbàgbó yèé à lí ó fu shishé l'ójulé wan. Yèenì ó, à ká sè san iwun yèé òbí-i wan ti she fú an ó kpadà fú an. Torí iwun yèé éè sàn l'ójú Ọlórun ó nì. ⁵ Akúkɔ yèé wà ùun dódó, shí kò lí olírànwlówó kàn ó, éè mū ojú gbè lá Ọlórun, shí t'òsán t'òru ó, éè mū kunkun lá àdúwà gbígbà, shí éè wà bere ìrànlówó Ọlórun. ⁶ Àmá akúkɔ yèé gbé ara è si fí ayé jíje dódó ó ti kú si lí òro. ⁷ Ò láti ré kó an lí iwun yè an, torí òníkàn kó ma rí iwun shínshinrìn kàn wí lá an. ⁸ Bójí òníkàn kèè mū ojú tó irá è an rere, kpàtakì ɔni ojulé è an, ɔni yè ti sé ìgbàgbó è, shí ó shinrìn kpere alárìgbàgbó.

⁹ Ítán shí ká kɔ orúkɔ akúkɔ kàn si l'ógu akúkɔ àan ó, kò kpò kò kpò ó, akúkɔ ó láti l'ódún ɔgóta (60), shí kó sè jí ɔkɔ òbú tookpokpo ján ó lí l'áyé è rí ni^c. ¹⁰ Ó sè bádé shí òníyàn an ká mà ú gbà lí iwun rere yèé éè she àan è: kó jí ó ti baní ɔma rere wáa lɔ, kó jí ó ti gba àlejò rere, kó jí ó ti we esè fí kríslánì^d an ó, kó jí ó ti mū ɔwó gbè fí ɔni yèé wà l'ójúùnkpán an ó, shí kó sè ré jí ó ti jí ashore lí iwun kpoo.

¹¹ Àmá, o máa kɔ orúkɔ akúkɔ yèé ɔdún wan kò lɔ ná an è. Lí èyító ó, bójí iwun awù ara-á wa l'ómi lí èké-ε wan, àà fèyìn fí Krísù, shí éè wù án ká kéè wo ɔkɔ òmírìn lí. ¹² L'íbè ó, àà jèbi, torí yèé a kò gbé l'ówó fí àlé àkpàshè yèé

^c5.9 Ìwé òmírìn án ní: shí kó sè jí ó gbé l'ówó fí ɔkɔ è yèé ti kú è

^d5.10 L'ásìkò yèé Pólù wà kɔ ìwé yèyí ó, bójí àlejò sɔ ni ó, àà shomi fu we esè fú u, shí éè mū díye ní à gbà ú.

à ta fí Krísù è. ¹³ Yèé tè ú ró ó, yèé a kò l'íshé l'ówó ó, àà wáa kàn ríreré l'áunkpànnà l'áunkpànnà, torí ká fu etí gbó. Shí yèé ré shinrìn yo ó, àà ré kékè jokó l'íshu ìyìn olíyìn wíwí, shí àà wà roko è, shí àà wà wí iwun yèé kò yε ká wí an è. ¹⁴ Yè she ó, ó wù úm shí akúkó yèé ɔdún wan kò ló ná an ó ká ré kékè wo ɔkó lí, shí ká bíma, shí ká mú ojú tó ojúlé wan rere. Yèénì ó, òtá wa àan kò kó yo rí ònà fu wí iwun shínshinrìn kàn lá ni. ¹⁵ Lí èyító ó, akúkó kàn án ti yako, shí à wà tìná Èshù. ¹⁶ Bójí krísiánì l'ólobìnrin kàn lí akúkó l'ójúlé è ni, kó ran akúkó ó l'ówó, shí kó ma wáa jí erù lí èké fí ìjó. Yèénì ó, ìjó ε kó sè mú ɔwó gbè fí akúkó yèé kò lí aláàbáwí an è.

Àgbà ìjó àan

¹⁷ Àgbà ìjó yèé éè darí ìjó wan rere àan ó, ó bádé shí ká wà shòyà fú an l'íkpònà méjì^e; kpàtakì àan yèé éè mú kunkun, shí àà kpa ara kata l'ónà ishé ìkédè ìyìn rere ó gbo èkó kíkó gbo è. ¹⁸ Lí èyító ó, Ìwé Mímá ó ti wíní:
"O kò láti mú okù fu di ɔrun lalá yèé wà fu esè fu gban òjè fée ó^f,"
shí à ré kó si ní:

"Ọni yèé wà shishé ó láti gba owó ishé è^g."

¹⁹ Bójí òníkàn wáa débi fí àgbà ìjó kàn l'édò ε ni, o máa gbà ú kún, bí kò jí òníyàn méjì nùmí òníyàn méta wáa yin ìjáráí ní ó jí békè. ²⁰ O wà bá Ọni yèé shè an ó fò l'ójú òníyàn kpóó, torí ojo kó she Ọni yèé bò an è.

²¹ Ñ wà bè é ùungbo owùn líle gbo l'Íwájú Ọlórun, l'Íwájú Jesúù Krísù

^e5.17 Ìwé òmírìn án ní: ká kpuwì fú an l'íkpònà méjì

^f5.18 E ka ìwé òfin méjì 25.4 kánná ìwé àkpàshè-ε Koréntì 9.9. Lí tuwan ó, lalá níí àà lò fu gban òjè-ε wan è

^g5.18 E ka ìwé ìyìn rere ti Matiyéè 10.10 kánná ìwé ìyìn rere ti Lùúkì 10.7

kánná l'íwájú ìjíshé òrun è anní, o yin òfin yèénì an l'ékpa l'ékpa, shí o máa wà gbà si lítá ònìkàn, shí o máa sè ré wà she ìyàtò lí èérin ònìyàn an.

²² O máa wà yá mú ɔwó si lítá ònìkàn. O máa wà lí ɔwó lí èshè ònìkàn, shí o sè wà lo ìgbésí ayé mímá.

²³ O máa tó wà mu omi dódó ró. Àmá o wà mu ɔtí èso fiýìn odé odé, torí inú èe yèé ó jí ε kèè kpín run arùn è.

²⁴ Ònìkàn án wà, shí èshè yèé à she àan ó éè ti bósi lí gbaungba ítán shí ká wíjó bá an; àmá ti olòmírìn an éè ti kpín ítán shí ká wa mà. ²⁵ Béè òbú ó, iwun rere yèé ònìyàn éè she ó, àà rí kpóó; shí yèé a kò sè na wà rí l'íshayí an ó kò kó yo gbé lí ìdúkù tití lo.

6

Erú an

¹ Óni yèé wà l'ábé yànyàn erú si kpèyí an ó láti wà lí ìteríba fí ògán wan lí iwun kpóó, torí ònìyàn an ká ma gbinrínrín orúkó Ọlórun, shí ká ré wà wí ìyìn shíñshinrìn lá èkó yèé àá wà kó an è. ² Àan yèé ògán wan jí olígbàgbó an ó, ká ma wà wò lá ɔmanà yèé à je l'ínú ìgbàgbó ó, shí ká wà wo ojú wan. Kàkà béè ó, ó bádé shí ká wà shishé fu sìn án rere kpere yèé tètè ó, torí yèé ó jí olígbàgbó an gbo ɔmanà àyànfé an gbo à wà shishé fí è. Iwun yèé ò láti kó an, shí o terun má fú an ó nì.

Ìfokànsìn kpíkpé

³ Bójí ònìkàn wà kó ònìyàn an lí èkó òmírìn, shí kò tìná èkó kpíkpé ti Olúwa wa Jesúù Krísù, kánná èkó yèé wà wí yebá à láti gbé gbà shí ká sàñ l'ójú Ọlórun ó, ⁴ òni yèénì ti kún fí ìgbéraga, shí kò ma ñkàn, shí asò gbo

àránñjìyàn shíshe lítá ìgbólówùn an gbo-ó ti sò ú di àkùnrùn. Shí iwun yéénì an éè fa owújíjé, àránñjìyàn shíshe, èkpè búbú, ìwíkuwí wíwí lá òníkéjì ni,⁵ ìyìn fífà lí ma mídé wá léerin òniyàn yéé ɔkàn wan ti ròshì si è. A kò ma iwun yéé jí èyító ó, shí àà déní Ọlórun sínsìn ó jí iwun yéé à ká fu wo owó ó ni.

⁶ Èyító ni, irò lítákún ìfókànsìn jé fí ɔni yéé bójí ó lí ñkàn éè ká u ó ni.

⁷ Torí àa kò baní ñkàn wá lítálè ayé ó, shí àa kò kó sè ré baní ñkàn ló l'íkú.

⁸ Báni, bójí àá wà rí ijé jé, shí àá wà rí ènù wò ni, kó wà ká ni. ⁹ Àmá ɔni yéé wà wò kó di olírò l'íkpá an ó, àà shubú jí lí ìdánwò Èshù, shí awù kú awù an éè tì án, shí àà she ìshekúshe, shí éè fà án si lí òfò, shí àà kpàdánù.

¹⁰ Lí èyító ó, ìfé lítí fí owó kajá jí egùgù iwun shínshinrìn an kpóó. Ojú òníkàn án gù lá owó, shí ó she, shí à yà kóò lítónà ìgbàgbó, shí ɔkpɔ yéé à wà rí ó di egúgú, shí ó wà gú an l'ókàn.

Èkó yéé Pólù kó Timotéè an è

¹¹ Àmá yéé wòò yè ò jí òniyàn Ọlórun ó, o yìn fí iwun yéénì an kpóó. Shí o ko mú kunkun, shí o wà she iwun ògangan gbo iwun ìrílójú gbo, o lí ìfókànsìn, ìgbàgbó, sùúrù kánná ɔkàn tútù. ¹² Jìjà rere ti ìgbàgbó ó, shí o baní àyè matán-matán ó yínyin-yínyin. Àyè matán-matán yéénì ní Ọlórun kpè é fí, shí ò yin ijáráí rere lá l'íwájú éléèrí kpíkpò è. ¹³ Ñ wà kpa ú lí àshé fée l'íwájú Ọlórun yéé éè fú iwun kpóó lí àyè ó kánná l'íwájú Jesúù Krísù yéé yin ijáráí rere l'íwájú Pónsú Pilátí ó, shí ñ wà ní, ¹⁴ o baní èkó yéé ñ kó e àan ó kpóó, shí ká ma rí ìwà gbíngbinrín nùmí ká gbó iwun shínshinrìn kàn lá e tití d'ìrè yéé Olúwa wa Jesúù Krísù e kó mú ara è díye òniyàn kpóó è. ¹⁵ Bójí ìrè ó tó, Ọlórun yéé jí Ọba olóre òbú tookpokpo, shí ó jí Olulú

olulú an kánná Olúwa olúwa àan ó ε kó mú wíwá Olúwa wa Jesúù Krísù díye.¹⁶ Ùún jí Ọlórun ḥobú tookpokpo yèé jí àrìkú, shí éè gbé lí ìmálè yèé ònìkàn kò kó yo sómá, shí ònìkàn kò rí rí, shí a kò kó sè yóo fu ojú rí ó ni. Ògo gbo agbóra gbo-ó jí tèè tití fí ayé matán-matán. Kó she.

Èkó l'ekpasè olírò an

¹⁷ L'íshàyí ó, ñ wà bè éní, o wí fí ɔni yèé lí irò ti ayé bibí an óní ká ma wà she ìgbéraga. Ká ma wà mú ìkara wan si lá irò yèé kò kó gbé tití lò è. Àmá, ká lí ìkara lá Ọlórun yèé éè fú ni lí iwun kpóó lí àshànkù, torí àa kó yo lò án è. ¹⁸ Shí o ré wí fú an ní ká wà shore, shí ore yèé à ká wà she ó kó wà kpò, ká wà shíwó fu bù jó, shí ká sè ré wà kpín iwun yèé à lí ó ùungbo ɔni yèé bò an ó gbo. ¹⁹ Bójí à wà she béké ó, báni à wà kpadí irò rere yèé ε kó gbé tití lò ó si fí èyìn òla nì, shí à ká sè rí àyè yèé jí àyè kpíkpé ó gbà.

Èkó ikényìn

²⁰ Àyànfé um Timotéè, o baní iwun yèé à mú bò l'ówó fée ó rere. Jìnà lá iyìn èsebede àan ùunri ìwíkuwí lá Ọlórun kánná iyìn yèé ɔni yèé mà ní àán lí ìmà an ó àà wí, shí kò ko jí ìmà kàn è. ²¹ Lí èyító ó, ònìkàn án tìná ìmà yèénì, shí à kò ònà ìgbàgbó ó jòó.

Ore òfē Ọlórun kó wà ùungbo ín gbo!

ÌWÉ ÈKÉJÌ FÍ TIMOTÉÈ

Ìwé èkéjì fí Timotéè

Ìmúdíye ìwé èkéjì fí Timotéè

L'ásìkò yèé Pólù wà l'ílé èwàn lí ìlú Ròómà, shí ó rí fòní ìrè ikú ùún ti sómá ó nií ó kɔ ìwé yèyí nikò lɔ fí Timotéè è (2 Timotéè 4.6-8). L'ínú ìwé ó, ó wí fú u ní kó wà ka ìyìn ɔlórun ó, shí kó sè wà kó òniyàn an lí èkó rere. Ó ré ní kó wà bá ɔni yèé ré kóò l'eyin èyító an ó fò, àan yèé éè she àránnìjìyàn lítá iwun yèé kò jo iwun àan è (2 Timotéè 3.1-9). Ó dárayin ú, shí ó ní, bójí ó bósi lí ìdánwò an kánná ojúùnkpán an ni, kó ma bi shí ìgbàgbó è kó mì kpéké.

L'ínú ìwé ó, ó ré ní lí èérin ɔni yèé shishé ùungbo ùun gbo àan ó, àan kpíkpò sá kò ùun jò ó, shí ó wa bɔ àan kakara méjì kàn an, shí à ràn ùun l'ówó. Yèé Timotéè jí àyànfé è kpíkpé ó, ó ní ó wu ùun núwan ùun bàá ré rí u ítán shí ùun kó kú. Shí ó sè kín òniyàn an, shí ó fu kparí ìwé è.

1

Okukínkín

¹ Ó wu ɔlórun, shí ó kpe wòm Pólù, shí n jí jeunkú Jesúù Krísù, shí àyè yèé à tálé si fí ni gbà lítá Jesúù Krísù ó, n kédè è fí òniyàn an. ² Ñ wà kɔ ìwé yèyí fí wòc ɔma àyànfé um Timotéè: Ore ɔfé, ɔdíròjú kánná tútù yèé ti l'edò ɔlórun Iba ó ùungbo Olúwa wa Jesúù Krísù gbo ó kó wà ùungbèegbo.

Pólù dókpé fí ɔlórun, shí ó dárayin Timotéè

³ Ñ wà kín ɔlórun yèé ñ wà sìn ùungbo ɔkàn mímá gbo gégébá títétíté um àán ti sìn ú wáa lɔ è. Màà dókpé fú u t'òsán t'òru l'írè kpóó yèé màà jáyè é

l'ínú àdúwà è. ⁴ Màà jáyè iyánkún l'ójú ε, shí èè wù úm tití núwan ñ ré rí ε, shí ayè kó té um. ⁵ N wà jáyè ìgbàgbó kpíkpé yèé ò lí ó kpèyí. Màmá ε Loyísì kánná ìnà ε Enísì ti kpàshè lí ìgbàgbó yèénì; shí ñ sè mà dákúdájú ní wòò katún ò lí ìgbàgbó unhún béè.

⁶ Yè she shí ñ wà she ijáyè fée ní, èbù yèé Olórun fú ε ti l'írè yèé ñ ti mú ɔwó si lítá ε ó, o baní è rere, shí kó ma kúná. ⁷ Lí èyító ó, Olórun kò fú ni lí èmí ojo, àmá ó fú ni lí èmí agbóra, èmí ifé kánná èmí ikpò ara ni mímà.

⁸ Kó ma wà shanú fée bójí ò wà yin ijári fí Olúwa wa. Kó ma sè ré wà shanú fée torí yèé ñ wà l'ílé èwàn torí Krísù è. Àmá, o jéwó, shí o ríkpò ùungbo wòm gbo fí ishé ikédè iyìn rere ó gbà l'ágbóra Olórun. ⁹ Ùún gba ni là ni, shí ó kpe ni, shí àa kó jí tèè. Kò sè shi torí iwun rere yèé àá wà she àan ó she shí ó jí béè, àmá torí ètò yèé ùun katún ti tò si ó gbo ore òfé è gbo ni. Ó ti fú ni l'ore òfé yèénì yèé àá dàkpò ùungbo Jesúù Krísù gbo ó ítán shí ká tè dá ayé ó. ¹⁰ Shí l'íshàyí ó, ó mú ore òfé ó díye ni gbà lí wíwá Olígbàlà wa Jesúù Krísù. Ùun nií shégun ikú, shí ó mú àyè àrítán ó hàn gbà lí ikédè iyìn rere è. ¹¹ Shí torí iyìn rere ó nií sè she shí Olórun so úm di akédè iyìn rere gbo jeunkú gbo kánná olùkó è. ¹² Iwun yèé sè she shí ojú wà kpán um l'íshàyí ó ní. Àmá kò shanú fú um, torí ñ ma ɔni yèé ñ mú ìgbàgbó um rò lá è. Shí ó sè dá um l'ójú ní, ó l'ágbóra yèé ε kó yo fu baní iwun yèé ó mú bò l'ówó fú um ó tití d'cjó yèénì.

¹³ O baní èkó rere yèé ò gbó l'órun ùum àan ó, l'ínú ìgbàgbó gbo ifé yèé àá lí yèé àá dàkpò ùungbo Jesúù Krísù gbo ó, shí kó jí iwlá fée. ¹⁴ Iwun rere yèé Olórun mú bò l'ówó fée ó, o baní è gbà l'ágbóra Èmí Mímá yèé wà ùungbo ni gbo è.

¹⁵Ò ti mà fòní, ḡni yèé wà lítálè Asìi an ó kpóó sá kò úm jò ó, kpàtakì Fijélì gbo Eemojénì gbo. ¹⁶Olúwa kó fu ojú àánú è fu wo ojulé Onesifòò, lí èyító ó, Onesifòò kèè hán l'édò um, éè wáa dárayin úm. Shí kèè sè shanú fú u yèé ñ na wà l'ílé èwàn è. ¹⁷Kàkà béké ó, yèé ó wá lí ìlú Ròómà ó, ó shagbóra tití, shí ó wò úm rí. ¹⁸Olúwa kó she shí kó rí ìdíròjú Olúwa gbà l'ójó^a yèénì. Lí èyító ó, wò katún ò ma ìrànlówó kpíkpò kpíkpò yèé ó she fú um lí ìlú Efésì è.

2

Sója agbélówó ti Jesúù Krísù

¹Báni, wò ḡma ùum, o mú ara le l'ínú ore òfé yèé àá lí lí ìdàkpò ùungbo Jesúù Krísù gbo è. ²Iwun yèé ò gbó shí ñ kó ònìyàn an l'ójú eléèrí kpíkpò ó, o mú bò l'ówó fí ònìyàn olíkaralá yèé ε kó yo kó olòmírin an línì ró è.

³Lí ìwá l'ínú ḡkpò rírí ó baní sója agbélówó ti Jesúù Krísù ni. ⁴Òníkàn kèè wà shishé sója, shí kó ré kó ishé òmírin bora, bójí ó wà wò kó sàn l'ójú ògán è. ⁵Béké òbú ó, ashèdùndùn iré sisá kàn kèè gba òyà, bójí kò sáré ó tìná òfin irésisá ó. ⁶Àròko yèé fá òogù ta l'íshu ishé ó ní láti kpàshè mú òjè oko è. ⁷O sérè èké lá iwun yèé ñ wà wí fée ó rere. Lí èyító ó, Olúwa ε kó ràn é l'ówó, shí è sho ríran si lí iwun kpóó.

Jáyè Jesúù Krísù yèé jí dìde ó

⁸O wà jáyè Jesúù Krísù yèé jí àbímaréma Dafídì è, ó jí dìde kóò lí èérin òkú an yebá Ìyìn Rere yèé ñ wà kédè fí ònìyàn an ó ti wí u è. ⁹Ìyìn rere yèénì ní sè she shí ñ wà rókpò tití, shí à mú um dè baní ashikà ni è. Àmá a

^a1.18 ḡjó ìdájó ó ní à wà wí ìyìn lá líbibí è

kò mú ìyìn Olórun ó yè dè.¹⁰ Yè she shí màà mú ojú ró lí iwun kpóó torí ɔni yèé Olórun shà si àan ó, shí àan katún ká yo rí ìgbàlà ti Jesúù Krísù gbo ògo matán-matán gbo gbà.

¹¹ Ìyìn yèyí ó jí ìyìn ìkaralá. Ùun níí jí:

Bójí àá kú ùungbèègbo,
àa ε kó sè gbé lí àyè ùungbèègbo.

¹² Bójí àá mú ojú ró,
àa ε kó joyè ùungbèègbo.
Àmá, bójí àá sé u,
ùun katún ε kó sé ni.

¹³ Bójí àa kò na gbé l'Ówó fú u,
ùun yè éè gbé l'Ówó,
torí kò kó yo sé ara è.

Ká kédè ìyìn èyító ó ùungbo ògangan gbo

¹⁴ O jáyè iwun yèénì an fí àan kpóó, shí o tekpán má u fú an l'Íwájú Olórun ní ká ma wà mú ìgbólówùn kàn si, shí ká wà she àránñìyàn lítá è. Lí èyító ó, èrè kàn kò sí lí àránñìyàn yèénì an shíshe bí kò jí kó mú ɔni yèé wà retí è an ó nùnà.¹⁵ O mú kunkun, shí o sàn l'ójú Olórun, shí o jí àshìshé yèé éè mú kunkun lá ishé è shí kèè shanú fú u ó, shí o sè wà kédè ìyìn èyító ó ùungbo ògangan gbo.¹⁶ O yìn fí ìyìn èsebede kánná ìyìn yèé kò jemá ìgbàgbó è. Lí èyító ó, ɔni yèé éè wà wí ìyìn yèénì an ó, àà wà jìnà lá Olórun l'írè kànjàán.¹⁷ Ìyìn wan wà baní ojuju yèé éè wà nà, shí éè wà jirà lòkóò, shí kèè kú láyé ó ni. Yebá Imenéè gbo Filétì gbo-ó sè wà ó nì.¹⁸ À kò èyító ó jòó, shí àà wí ní àjíùnde òkú aán ti wáa ló, èkó yèénì yèé àà wà kó òníyàn

án she shí òníyàn kpíkpò kpíkpò ré kóò l'ónà ìgbàgbó. ¹⁹ Ó wà béè ítán shí ìkpìlè ilé yèé Ọlórun mú gúlè ó yin rere, shí kò kó yø mì kpéké. ìyìn yèé à kò si lá è ó níí: «Olúwa ma ɔni yèé jí tèè an ó,» shí «Bójí òníkàn sè ní ùún jí ti Olúwa ni, kó ré kóò l'éyìn èshè.»

²⁰ Bójí ò tó l'ílé olówó, kò shi igbá yèé à fu wúrà gbo owó idé gbo fu she àan ó dódó àà rí. Àmá àà ré rí yèé à fu amà fu ma ó kánná yèé à fu egi fu she àan ó katún. Àà lo yèé à fu wúrà gbo owó idé gbo fu she àan ó, bójí à wà wò ká she iwun lílákún an, shí àà lo yèélèé an ó l'írè kpóó. ²¹ Bójí òníkàn jìnà fí iwun shínshinrìn yèé ñ wí ìyìn lá an ó, olúwè ε kó wà baní igbá eléwà yèé à ya si l'ótò, shí Olùkó ó ε kó yø lò, shí kó fu she iwun jo iwun è.

²² Sá fí awù kú awù yèé ɔmàshó an éè lí ó, shí o dabá iwun ògangan, ìgbàgbó, ifé kánná tútù ùungbo ɔni yèé éè gbàdúwà fí Olúwa gbo ɔkàn mímá an ó gbo. ²³ O máa wà mú ɔrun bò lí àránnjìyàn yèé òníyàn an àà she lítá ìyìn àdìlè kánná ìyìn yèé kèè l'órun àan ó, torí wò katún ò ti mà fòní àà fa asò wá. ²⁴ Ìbèlíshé Olúwa kò láti wà sò. Àmá ó láti lí ifé fí òníyàn kpóó, shí kó jí òníyàn yèé ε kó yø kó òníyàn an lí èkó ó, shí kó sè ré jí òníyàn olísùúrù. ²⁵ Ó láti wà bá ɔni yèé éè fa ìyìn bá u àan ó fò ùungbo akpè gbo: bí ó wù, Ọlórun ε kó she shí à ká ronúkpìwàdà, shí ká ma èyító ó. ²⁶ L'íbè ó, ojú wan ε kó shí, shí à ká bó kóò lí àja yèé Èshù ti fu mú an, torí ká she awù è ó.

3

Pólù wà wí ìyìn lá iwun yèé ε kó wa shelè l'ójó ìkényìn an ó

¹ O jáyè ní: l'ójó ìkényìn an ó, àṣìkò líle kàn an ε kó wa gbé. ² Lí èyító ó, òníyàn an à ká wà ní ti àan dódó kó sàñ, à ká lí ifé fí owó, à ká wà fu ara wan fu yakin, shí ká wà she ìgbéraga. À ká wà yárun lá Ọlórun, shí ká wà shàrìgbóràñ fí òbí-i wan. A ká jí alárìmore, shí a kò kó ré wà lí ìbèrù fí iwun Ọlórun àan. ³ Iwun òníkàn kò kó wà shàkpò l'ójú wan, a kò kó sè díròjú òníkàn. À ká wà shìkpèríkó, shí a kò kó wà lí sùúrù, à ká dasín, shí à ká wà kóòríra iwun rere shíshe. ⁴ À ká wà gbé òníyàn an tà, shí a kò kó wà sérè èké ítán shí ká wà she iwun, à ká kún fí ìgbéraga, shí ifé yèé à ká lí fí ayéjíjé ó ε kó kpere yèé à ká lí fí Ọlórun è. ⁵ À ká wà mú díye ní àán jí òníyàn olífókànsìn, shí agbóra yèé wà lí ifókànsìn ó, à ká ko kò ú jòjó. Àmá wòò yè, o máa wà she iwun ùungbo òníyàn unhún béè an gbo. ⁶ Torí òníkàn án wà léerin wan, shí àà yóùlè fu ló l'árolé an, shí àà kéè ta ikpán fí olobìnrin yèé kò ma ñkàn, shí erù èshè wà wò, shí adùn ara l'óríshi l'óríshi àan éè dùn ná ó, shí àà jí línì. ⁷ Olobìnrin yèénì an éè wà gba èkó l'írè kànjáán, ítán shí iwun èyító ó kèè sè yé an láyé. ⁸ Yebá Janésì gbo Jambrésì gbo-ó ti kó ìyìn Moyísì ó, béè jáñ ḥni yèénì an katún wà kó ìyìn èyító ó ni. Ọkàn wan ti ròkàrà, shí ìgbàgbó wan sè ti shubú. ⁹ Àmá kò gbé an lòkóò l'ídì kàn, torí òníyàn kpóó ε kó ríran si lítá ìyìn àdìlè-ε wan gégébá ó ti jé gbà fí Janésì gbo Jambrésì gbo è.

Èkó ikényìn an

¹⁰ Àmá wòò yè, ò ríran si lí èkó um àan, ìshísè um, ètò um àan kánná ìgbàgbó yèé ñ lí è. Ò ré ma yebá màà lí sùúrù tó, shí màà lí ifé fí òníyàn an kánná yebá màà mú ojú ró è. ¹¹ Ò ma ojú yèé kpán um kánná ɔkpɔ yèé ñ rí an è. Ò ma iwun yèé bá um lí ìlú Antióshì gbo Ikoníómù gbo kánná Lisítrù è. Ojú yèésí bò, shí a kò dá kpán um le? Àmá Olúwa gbà úm là kóò ná iwun yèénì an kpóó. ¹² Lí èyító ó, ɔni kpóó yèé wà wò kó lo ìgbésí ayé mímá l'ójú Ọlórun torí yèé à dàkpò ùungbo Jesúù Krísù gbo ó, à ká dójú kpán ú. ¹³ Àmá òníyàn shínshinrìn an gbo ɔni yèé éè rú ni àan ó gbo, à ká wà she iwun shínshinrìn gùlé. À ká wà ré òníyàn an je, shí àan katún à ká ré wà ré ara wan je. ¹⁴ Àmá wòò yè, o baní èkó yèé à kó ε, shí ò gbà kún ní ó jí èyító ó si l'ókàn rere; ò sè ma ɔni yèé kó ε línì an è. ¹⁵ Lí èyító ó, ti lí ɔma kékeré ε, ò ti ma Ìwé Mímá ó ni. ε kó sè fú ε lí òye yèé éè she shí àà rí ìgbàlà, bójí à gba Jesúù Krísù gbó è. ¹⁶ Èmí Ọlórun nií mú iwun yèé à kó si lí Ìwé Mímá ó kpóó si l'ókàn fí òníyàn an è, shí ó sè sàñ shí ká fu kó òníyàn an lí èkó, ká fu shígbá lítá iwun yèé kò shi èyító ó, ká fu mú ònà rere ó díye, shí ká ré fu kó yebá à ká ti she, shí ká wà she iwun ìgangan è. ¹⁷ L'íbè ó, ìbèlìshé Ọlórun ó, ε kó sè dògba si, shí ε kó lí iwun yèé ó láti lí, shí kó fu she iwun rere àan ó kpóó.

Kéde ìyìn Ọlórun

¹ L'íshàyí ó, l'íwájú Ọlórun kánná l'íwájú Jesúù Krísù yéé lèwa kó wa déjó fí ɔni àyè an gbo ɔni ikú an gbo, shí ε kó wa fu ara hèn, shí ε kó joyè ó, ñ wà bè é ùungbo owùn líle gbo, shí ñ wà ní: ² O kéde ìyìn Ọlórun ó fí òníyàn an, shí o wà tekpán má u bí ìrè ó sàn gbo kò sàn gbo, shí o wà mú iwun yéé à she sélè ó fu yé an, o wà bá an fò, shí o sè ré wà dárayin án, shí sùúrù kó sè ká ε bójí ò wà kó an lí èkó. ³ Lí èyító ó, àsìkò kàn lèwa, shí kò kó tó wu òníyàn an, shí ká gbó èkó rere ó ró. Àmá à ká wà sáré l'eyín awù kú awù-u wan, shí à ká wà dagu olùkó yéé ε kó wà wí iwun yéé ε kó díun gbó fú an è. ⁴ À kò kó tó wà wò ká mu etí si l'ílè, shí ká gbó èkó èyító ó ró, shí à ká yíndé dà l'eyín ìtan yéé kèè l'órun àan ó. ⁵ Àmá wòò yè o múra èe gírí lí iwun kpóó, jéwó fí ɔkpɔ́ rírí, shí o shishé ìkédè Iyìn Rere ó, shí o sè ré shishé yéé Ọlórun bè é ó jálè.

Àsìkò yéé Pólù ε kó sókò l'áyé bibí ó ti yá

⁶ Wòm yè ó, àsìkò yéé mà n sókò l'áyé bibí ó ti yá, shí mà n mú ayé um jó baní εbɔ́ ìre wúwú ni. ⁷ Àmá, ñ jìjà rere ó yebá ó ti ye gbà è, ñ rin ìrin ó kèè já, shí ìgbàgbó um kò sè shubú. ⁸ Ti l'íshàyí ó, à ti kpèsè adó oyè ti ológangan àan si fú um. Olúwa yéé èè déjó ùungbo ògangan gbo ó, ε kó fú um lí adó oyè ó l'ójó ìdájó, kò sè shi wòm dódó ε kó fú línì, àmá ε kó ré fú ɔni kpóó yéé lí ifé fú u, shí à wà dórode wíwá è è.

Ìgbólówùn ìkényìn an

⁹ O shagbóra, shí o wá l'édò um l'árì kpín. ¹⁰ Lí èyító ó, Demásì ti sá kò úm jò ó. Iwun ayé bibí aán kpánjú fú u yo, shí ó ló lí Tesaloníkì. Kresánsì katún ló l'ésèkè-e Galátì, shí Títì yè ló l'ésèkè-e Dalimátì. ¹¹ Lùukì dódó ján wà ùungbo wòm gbo ni. Bójí ò lèwa ni, o gbé Mákì wá torí ó má ɔwó fú um l'íshé ó. ¹² N bẹ Tishíkì yè ló lí ilú Efésì.

¹³ Bójí ò lèwa ni, o gbé èwù gúgù yèé nì jòó si lí ilú Troásì l'édò-ó Kaapósì ó wá fú um, shí o sè ré kó ìwé an ó katún, kpàtakì ìwé yèé à mú awo eran fu she àan ó.

¹⁴ Alesándrì àgbède ó she iwun shínshinrin kpíkpò lá um. Àmá, Olúwa ε kó sè san ú kpadà fú u. ¹⁵ Wòo katún, o shóra èe lá è, lí èyító ó, ó kó ijà bá ni l'íshu ìyìn yèé àa éè wà wí fí òníyàn an è.

¹⁶ Lí àkpàshè yèé nì kékè gbijàjà l'éríwo ùum l'ílé ejó ó, n kò rí òníkàn l'eyìn. Àan kpóó sá kò úm jòó. Olórun kó ma ka èshè yèénì kún fú an. ¹⁷ Olúwa gbé l'eyìn um, shí ó fú um lí àmí, shí nì kédè ìyìn ó kpóó fí òníyàn an, shí ɔni yèé kò shi Jùú an ó kpóó gbó u. Shí Olúwa gbà úm là kóò l'órun jàùntá. ¹⁸ Olúwa ε kó yo úm kóò ná iwun búburú an kpóó, shí ε kó sè gbé um wòsi lí ijøba òrun è. Ògo ni fú u fáyé matán-matán! Kó shε.

Oku ìkényìn an

¹⁹ O kín Prísíkà^b gbo Akilásì gbo fú um, shí o sè ré kín ɔni ojúlé Onesifòò an. ²⁰ Erásì yè gbé lí ilú Koréntì. Kò rɔ Trofímù, shí nì jòó è si lí ilú Milétì. ²¹ Àmá, o shagbóra, shí o wá ítán shí àṣíkò òjò gbo otútù gbo kó wá.

^b4.19 Òníyàn òbú yèé à kpè lí Prísíkà líbibí ó ján jí Prisílì lí ìwé ishe jeunkú an 18.2 ni

Ebulúsì gbo Pudénsì gbo kánná Linúsì wà kín ε. Kolodíà gbo ɔmanà yèé bò
an ó gbo kpóó wà kín ε.

²² Olúwa kó wà ùungbèegbo. Ore ɔfē Olórun kó wà ùungbo iin kpóó gbo.

ÌWÉ FÍ TÍTÌ

Ìwé fí Títì

Ìmúdíye ìwé fí Títì

Títì jí ɔni Gèrékì, shí ó wa gba Jesúù gbó, shí éè wà tìná Pólù wéjá wéjá (Ìwé-e Títì 1.4). L'íbè ó, Pólù jòjò è si lí ìlú-u Krétì (Iwé-e Títì 1.5), torí kó darí olígbàgbó yèé wà bè an è.

L'ínú ìwé yèé ó kɔ lɔ fí Títì ó, Pólù wí yebá adarí ijɔ àán láti gbé gbà ó kánná yebá à láti darí olígbàgbó an gbà è (Iwé-e Títì 1.5-9). Ó ré wí yebá à láti wà kó olokìnrin àan kánná olobìnrin àan lí èkó gbà ó. Shí ó sè ré wí yebá à láti wà kó ɔmòshó an gbo olokìnrin yèé ɔdún wan ti lɔ àan ó gbo lí èkó gbà ó kánná yebá erú an láti wà lí ìteríba fí ìgán wan è. Shí lí ikparí ó, Pólù ré wí ìwà yèé olígbàgbó láti wà lò ó kánná yebá ó láti wà yà fí ɔni yèé wà kó èkó ɔdì an è. Ó ré wí yebá iyìn rere ó éè fa ìgbàlà wá fí ònìyàn, shí éè ré sɔ ú di mímá è (Iwé-e Títì 1.3 kánná 2.11-14).

1

Okukínkín

¹ Wòm Pólù yèé jí ibèlìshé Olórun, shí ñ ré jí jeunkú Jesúù Krísù ó níí wà kɔ ìwé yèyí è. Olórun bè úm ní n kédè iyìn rere ó fí ɔni yèé ó ti shà si àan ó, shí ká gba Jesúù gbó, shí ká ré ma èyító, shí ká lí ibèrù fí Olórun. ² Yèénì ó, à ká lí ifojúgbè si ní àan ε kó rí àyè matán-matán. Olórun yèé kèè shàá ó sè ti tàlé àyè yèénì si fí ni ítán shí kó dá ayé ó. ³ Shí yèé àsìkò ó tó ó, ó shígbá lítá àyè matán-matán ó gbà lí iyìn è yèé ó mú bò l'òwó fú um è. Shí ñ sè wà kede è yebá Olórun Olígbàlà wa ti bè úm lɔ è.

⁴ Ñ wà kɔ ìwé yèyí fí wò Títì, ɔma ùum kpíkpé l'ínú ìgbàgbó yèé da ni

kpò è. Ore ìfè kánná tútù yèé ti l'édò Ọlórun Iba kánná Olígbàlà wa Jesúù Krísù ó kó wà ùungbèegbo.

Ishé yèé Títì e kó she lítálè-e Krétì è

⁵ Ñ jòjì e si lítálè-e Krétì, torí o to ètò yèé bò an ó, shí gégébá ñ ti bè é gbà ó, o yan àgbà ijò àan si l'órun ijò yèé wà lí ìlú òbú òbú ó. ⁶ Àgbà ijò ó láti jí ɔni yèé a kò kó yó rí iwun shínshinrìn kàn wí lá è; ó láti lí aya^a òbú tookpokpo. Ọma è án láti jí olígbàgbó, shí ɔrun kó ma wà kùn án ní àà shìshekúshe nùmí àà shàràgbóràn. ⁷ Lí èyító ó, yèé ó jí adarí ijò éè mú ojú tó ishé Ọlórun ó, a kò láti rí iwun shínshinrìn kàn wí lá è: Kò láti wà wórun, kò láti wà kannú, kò láti jí àmòtí, kò láti wà runra, kò sè láti wà wo owó lí ìwòkúwò. ⁸ Kàkà béè ó, ó láti wà gba àlejò rere, shí kó lí ifé fí iwun rere shíshe. Ó láti wà she iwun l'íwànbà, kó jí òníyàn ɔlágangan, òníyàn alo ìgbésí ayé mímá, shí kó ré wà ma ikpò ara è. ⁹ Ó láti baní ìyìn ìkaralá yèé jemá èkó kpíkpé yèé à kó u ó si l'ókàn rere. Yèénì ó, e kó yó mú èkó kpíkpé ó fu dárayin ɔni yèé bò an ó, shí kó sè mú ìshènà ɔni yèé wà she àránñìyàn bá u àan ó díye án.

¹⁰ Lí èyító ó, òníyàn kpíkpò wà, shí a kèè lí ìteríba fí òníkàn, kpàtákì léerin Jùú yèé gba Jesúù gbó an ó, àà wà wí èsebede fu ré ɔni yèélèé an je. ¹¹ O ki ìyìn si l'órun fú an. Iwun yèé she ó, àà torí owó, shí àà wà kó òníyàn an lí iwun yèé kò ye ká kó an ó tití shí àà fí ojúlé an. ¹² Alágbáwí Ọlórun wan kàn yèé jí ɔni ìlú wan ó ti wí ní:

“ɔni Krétì an ó, èwá dódó àà she ni, shí à jí eranko búburú, òkùwà, kánná wàfun-wàfun.”

^a1.6 Ìwé òmírìn án ní aya òbú tookpokpo ján ó láti lí rí ni

¹³ Èyító ó sè wí ni. Yè she ó, o bá an fô ùungbo owùn líle gbo torí ká yo lí ìgbàgbó kpíkpé, ¹⁴ shí ká ma tó wà kékè jokó l'íshu ìtan Jùú an yèé kékè l'òrun àan ó kánná òfin ɔni yèé kò sí lítónà èyító an ó ró. ¹⁵ Iwun kpóó éè má l'ójú ɔni yèé ɔkàn wan má si àan ó, àmá ɔni yèé ɔkàn wan gbinrínrín, shí à kò ní àan kò kó gbàgbó an ó, ñkàn kékè má l'ójú wan, torí ìràánmà wan gbo ɔkàn wan gbo-ó ti ròshì. ¹⁶ Àà ní àán ma ɔlórun, àmá ìwà wan éè mú díye ní a kò mà ú. Ònìyàn ká kóòríra àan à jé ni, alárìgbóràn an, shí a kò kó sè yóo she iwun rere kàn láyé.

2

Yebá olígbàgbó aán láti gbé gbà lí èérin ara wan ó.

¹ Àmá wòò yè, o wà kó ònìyàn an lí iwun yèé jemá èkó kpíkpé ó. ² O kó olòkìnrin yèé ɔdún wan ti lò àan ó ní ká wà she iwun l'íwànbà, ká wà ma ikpò ara wan, ká kún fí òye, ká lí ìgbàgbó kpíkpé gbo ifé gbo, shí ká sè wà lí sùúrù.

³ Béè òbú ó, o ré kó olobìnrin yèé ɔdún wan ti lò àan ó ní ká lo ìgbésí ayé míímá yebá ó bádé shí ɔni yèé ma ɔlórun ó kó lo ìgbésí ayé è gbà è. Ká wà shìkpéríkó, nùmí ká wà mu ɔtí kpara, àmá ká wà kó ònìyàn an lí iwun yèé sàñ ó, ⁴ ká sè wà kó olobìnrin yèé ɔdún wan kò lò ná an ó lí yebá à ká ti she gbà, shí ká wà lí ifé fí ɔkó wan gbo ɔma wan gbo è. ⁵ Ká kó an ní, ká wà she iwun ùungbo òye gbo, ká lo ìgbésí ayé míímá, ká wà shishé ilé wan dògba, ká lí ìwà rere, shí ká wà lí ìteríba fí ɔkó wan, torí ìníkàn kó ma rí iwun shínshinrìn kàn wí lá ìyìn ɔlórun ó.

⁶ O dárayin ɔmòshó an katún, shí ká kún fí òye ⁷ lí iwun kpóó. Wòò katún

ò láti jí òníyàn olíwòlá lí iwun rere shíshe. O wà fu èkó ε fu kpe èkó jo èkó, shí ká rí ní ó jí èkó kpíkpé.⁸ O wà wí ìyìn yèé dógba shí a kò kó yo rí ñkàn wí lá è. Yèénì ó, ðtá an à ká rí anú, torí yèé a kò kó rí iwun shínshinrìn kàn wí lá ni è.

⁹ Erú an katún ká wà lí ìteríba fí ògán wan lí iwun kpóó, shí ìshísè-ε wan kó wà sàñ l'ójú ògán wan, ká ma wà jùgbàn ɔrun bá an,¹⁰ shí ká ma sè wà shole ñkàn lí ògán wan. Ká wà mú díye l'írè kpóó ní àán jí òníyàn agbélówó. Yèénì ó, à ká sè kpuwì fí èkó Òlórun Olígbàlà wa lí iwun kpóó.

¹¹ Lí èyító ó, Òlórun mú ore ðfé è yèé éè fa ìgbàlà wá fí òníyàn kpóó ó díye. ¹² Shí ore ðfé ó wà kó ni ní, àa kó kó èshè gbo adùn ayé bibí an gbo jòjó, shí bójí àá yo wà l'ayé yèyí ó, àa kó wà she iwun ùungbo òye gbo, ùungbo ògangan gbo kánná ìfokànsìn. ¹³ Yebá àá láti dórude ɔjó ti ìfojúgbè rere ó ní; l'ójó yèénì ó, Olígbàlà wa Jesúù Krísù yèé jí Òlórun lílákún wa ó ε kó mú ògo è díye ni. ¹⁴ Ùun katún mú ara è jó l'éríwo wa, torí kó gba ni kóò l'ínú èshè wa àan kpóó, shí kó sò ni di aro mímá yèé jí ti ùun dódó è. Yèénì ó, àa ε kó sè mú kunkun lá iwun rere shíshe ùungbo ìtara gbo.

¹⁵ Iwun yèé ò láti kó òníyàn an ó ní; shí o sè wà dárayin án, shí o wà bá an fò ùungbo àshè yèé ò lí ó kpóó gbo. Òníkàn kó ma sè wo ojú ε.

3

Ìshísè yèé krísiánì án láti lí ó

¹ O jáyè fí krísiánì an kpóó ní à láti wà lí ìteríba fí olórí an kánná ògán ìlú an, ká wà gbóràn fú an, shí ká sè ré dógba si fí iwun rere shíshe. ² Ká ma wà wí ìyìn shínshinrìn lá òníkàn, ká ma wà sò bá òníkàn. Àmá ká kún fí inú

rere, shí ká sè ré jí ònìyàn olínú tútù yèé éè fa ònìyàn kpóó má ara l'írè kànjáán è.

³ Torí tètè rí ó, àa katún aán ti jí alárìlóòye, alárìgbóràn, shí àá ti nùnà. Àá jí erú si fí iwun ìsérè kú ìsérè gbo awù kú awù an gbo, shí àá jí ashìkà, shí ojú wa éè gù lá iwun olíwun, shí àà kóòríra ni, shí àa katún àa éè kóòríra wan. ⁴ Àmá yèé Òlórun Olígbàlà wa mú inú rere è gbo ifé è gbo díye àa ònìyàn an ó, ⁵ ó gba ni là. Kò sè shi torí kó jí àa éè she iwun ògangan she shí ó jí béè. Àmá ó rí àánú wa, shí ó gba ni là, shí ó we ni má. Shí gbà lí àwèmá yèénì nií Èmí Mímá éè fú ni lí àyè tuntun, shí éè ré so ni di ònìyàn tuntun è. ⁶ Òlórun fú ni lí Èmí yèénì ó lí àshànkù gbà lítá Jesúù Krísù Olígbàlà wa, ⁷ torí bójí Òlórun dáre fí ni dábò gbà l'ore òfē è ni, àa kó jogú àyè matán-matán yèé àá mú ojú gbè lá è.

⁸ Ìyìn yèénì sè jí ìyìn ìkaralá. Shí ó sè wù úm, shí o terun má u rere fú an, torí ɔni yèé gba Òlórun gbó an ó ká múra, shí ká wà she iwun rere. Iwun yèé she ìyánjú, shí ó bádé fí ònìyàn ó ni. ⁹ Àmá o maa wà mú ɔrun bò lí ìyìn èsebede wíwí, ìtan okù bíbí, asò kánná àránnìjìyàn l'ekpasè òfin, torí iwun yèénì án jí iwun asán, shí a kèè sè fú èrè kàn. ¹⁰ Bójí òníkàn wà fa ìkpín wá lí èérin ònìyàn an ni, o kò iwun fú u. Bójí ò kò ú fú u lí àkpàshè, shí kò gbó, o ré kò ú fú u l'áunkéjì. Shí bójí kò ré gbó ni, o dá u jò. ¹¹ Torí, ò ti mà ní ònìyàn unhún béè ti yà kóò lítónà rere ó, éè wà jí kpàfò lí èshè, shí iwun yèé ó wà fu ɔwó arè è fu she àan ó nií wà débi fú u è.

Ìgbólówùn ìkényìn an kánná okukínkín

¹² L'írè yèé mà n be Aatemásì nùmí Tishíkì wá féé ó, o shagbóra shí o wáa kpàdé um lí ìlú Nikopolísì. Lí èyító ó, l'íbi ó wù úm, shí n gbé l'ásìkò òjò

kánná àsìkò otútù ó nì.

¹³ O shagbóra shí o ran Senásì agbejówí ó l'ówó ùungbo Apolósì gbo, shí ñkàn kó ma hán an, shí ká yo lɔ lí ìlú ibi à lòkóò è.

¹⁴ Ó ye shí irá wa àan katún ká wà mú kunkun lá iwun rere shíshe, shí bójí iwun kpàtákì kàn bó si fú an ni, ká yo wà fu mójútó ara wan. Yèénì ó, ε kó sè jí a kò gbé l'áyé ó rá.

¹⁵ Ọni yèé wà ùungbo wòm gbo líbibí an ó kpóó wà kín ε. O kín ọni yèé féràn wa l'ínú ìgbàgbó an ó fú um. Ore ɔfē Ọlórun kó wà ùungbo ìin kpóó gbo.